

եր նրա սիրուն գլուխը: Նա աւելի կանացի դեմք ուներ, բայց գունաթափ, թախծալի դեմք: Գուցէ հայրենի աշխարհի տպաւորութիւնները խլեցին նրա երեսի գոյնը: Լուռ էր նա, չէր խօսում: Ինձ թւում էր, թէ նրան տիրում էր մի տեսակ ապշութիւն, մի տեսակ ինքնամոռացութիւն: Եթէ իր երկար կօշիկների խթաններով երբեմն մեքենաբար չխթեր իր ձիու կողքը, նրա ձին կը կանգներ, որովհետեւ սանձը թուլացել էր նրա ձեռքում, իսկ մտրակը ընկել էր ձեռքից: Խեղճ տղայ, ինչեր էին անցնում նրա սրտից. ինչ բանի վրայ էր մտածում նա: Ասլանը խոստացաւ ասել ինձ, թէ ո՛վ էր նա, եւ այդ հետաքրքրութիւնը տանջում էր ինձ:

Մենք անցանք Յացիկ գիւղը, որ այժմ կոչւում է Խաս-գիւղ: Նա դարձաւ դեպի ինձ այդ խօսքերով.

– Մեր պատմաբաններից մէկը, Փաւստոսը, այդ գիւղի չորրորդ դարու բնակիչներին «կարճագատթէ ածականը տոեց, որ նշանակում է կարիճների զաւակներ: Մեր այժմեան լեզուում կարճագատը չարաճճի բառի իմաստն ունի: Հին դարերում Յացիկի բնակիչները յայտնի էին իրանց անբարոյական բարք ու վարքով, մանաւանդ կանայք: Մեր Յուսիկ կաթողիկոսի որդի Պապը մի հարճ ուներ, որը այդ գիւղիցն էր: Այն օրից անցել է տասնեւտեց դար, բայց Յացիկի բնակիչները դեռ իրանց վարք ու բարքը չեն փոխել: Այստամենայնիւ, Յացիկը անմոռանալի կը մնայ ամէն մի հայի համար, որովհետեւ նա Մեսրոպի ծննդավայրն է:

Երբ գիւղից դուրս եկանք, հեռոցից նկատեցինք, որ մեր առջեւով գնում էին երկու ձիաւորներ: Ինչպէս երեւում էր, նրանք այդ գիւղումն էին իջեւանել, որովհետեւ մի քանի գիւղացիներ նրանց ճանապարհ էին դնում: Տեսնում էինք, թէ ինչպէս գիւղացիները մօտեցան երկու ձիաւորներից մէկին, նրա աջը համբուրեցին եւ, օրհնութիւնը առնելով, վերադարձան դեպի իրանց տները: Արդէն յայտնի էր, որ նա պէտք է հոգեւորական լինէր:

Երկար մենք եւ նրանք, միեւնոյն հեռաւորութեան վրայ, գնում էինք միեւնոյն ճանապարհով: Յետոյ կատեցինք, որ նրանք սկսեցին իրանց ձիաները կամաց քշել, որ մենք հասնենք:

Մեր ենթադրութիւնը ուղիղ դուրս եկաւ. երկու ձիաւորներից մէկը հոգեւորական էր, բայց երրորդացի հոգեւորական: Իսկ միւսը, ինչպէս երեւում էր, կամ նրա ծառան պէտք է լինէր, կամ առաջնորդը: Ես առաջին անգամ տեսնում էի մի երրորդացի կրօնաւոր: Նա քառասուն տարեկան հազիւ կը լինէր, բայց սեւ մօրուքը արդէն սկսել էր ճերմակիլ: Դեմքը ինձ շատ դուր եկաւ, մի ուրախ, մշտածիծաղ դեմք, որ, կարծես, ասում լինէր. «Ես վաղուց ձեզ հետ բարեկամ եմ»: Գլխին դրած ուներ լայնեզրեայ փափուկ գլխարկ սեւ գոյնով